

摘藻堂四庫全書薈要

集部

欽定四庫全書薈要

集部

御定歷代題畫詩類卷一百十五

六

欽定四庫全書薈要

御定歷代題畫詩類卷一百十五目錄

宮室類

諸子將築室以畫圖相示 宋蘇轍三首

題李公麟山莊圖 宋蘇轍二十首

次朱元晦韻題嚴居厚溪莊圖 宋陸游

題嚴居厚溪莊圖 宋朱子

墨莊圖 宋朱子五首



野莊圖 元王惲三首

題董承旨野莊圖 元張伯淳

題張季雲先生山莊圖 元王惲三首

雨後山莊圖 元范梈

題莫氏山莊圖 元黃潛

題玉山中錢舜舉畫五柳莊圖 元張天英

題梅莊圖 明華幼武

題汪季路太丞魏野草堂圖 宋楊萬里

題橋南堂圖

宋陸游

題武教授峨眉山路堂圖

元王惲

西郊草堂圖

元虞集四首

題劉生庸道五壯草堂圖

元貢師泰

題良常草堂圖

元倪瓚

韋羌草堂圖

元倪瓚

陳履元畫玉山草堂

元鄭元祐

題錢伯珍所藏草堂圖

元釋良琦

徐雪舟為畫藍礪草堂圖 明藍智

題彭氏背郭草堂圖 明劉崧

題黃典籍東州草堂圖 明陳思孝

趙松雪怡樂堂圖 元鄧文原

題趙松雪怡樂堂圖 元張雨

題九靈山房圖 元愛理沙

九靈山房圖 元丁鶴年

題五龍山房圖 明僧宗泐

題唐子華畫王師魯尚書石田山房

元張翥

題黃都事仲綱山居溪閣圖

元虞集二首

王叔明為陳惟允天香書屋圖

元黃公望

題劉生庸道竹林書室圖

元貢師泰

竹谿草堂圖

元舒頔

鳴山書舍圖

明高啓

蜀山書舍圖

明高啓

蜀山書舍圖

明徐賁

竹雪書房圖

明楊榮

題李景昌竹間書舍圖

明于謙

柳塘書舍圖

明李德

題蔡文翰墨溪書屋圖

明廖道南

題孺山書屋圖

明王世貞

題東洋書屋卷

明王世懋二首

倣子久秋山書屋

明李日華

龍門茶屋圖

元倪瓚



石田茅屋圖

明解縉

題伯穎雲林茅屋圖

明藍仁

題徐都憲小邨竹屋卷

明李東陽

題弋陽巖山精舍圖

元素桷

吳儁仲傑橫河精舍圖

元張翥

賦德機荆南精舍圖

元倪瓚

上虞魏氏湖上精舍圖

元陳樵

虎丘老僧有竹林精舍文伯仁為圖之王履吉書

疏於後余游竹林僧出示此卷履吉下世已三十載矣為之憮然因成此詩

明王世貞

題曹氏春江雲舍圖

元華幼武

題朱澤民荆南舊業圖

明高啓

為黃伯昂題君山別業畫卷

明程本立

欽定四庫全書薈要卷一萬九千二百二十三

集部

御定歷代題畫詩類卷一百十五

宮室類

諸子將築室以畫圖相示

三首

宋

蘇轍

還家卜築初無地隨分經營似有時多斫修篁終未忍  
略存古柏更無疑畫圖且作百間計入室猶應三歲期  
得到安居真老矣一生歌哭任於斯

舊廬近已借諸子新宅分甘臨老時萬里松楸終獨往

四方兄弟亦何疑竹間疎戶幽人到林上長松野鶴期  
已覺高軒慚衛賜可憐黃犬哭秦斯

積因得果通三世臨老長閒自一時久爾觀心終未悟  
偶然見道了無疑南遷北返吾何病片瓦尺椽天與期  
自斷此生今已矣世間何物更如斯

題李公麟山莊圖

并序

宋蘇轍

伯時作龍眠山莊圖由建德館至垂雲泚著錄者十  
六處自西而東凡數里巖崿隱見泉源相屬山行者

路窮於此道南溪山清深秀峙可游者有四曰勝金  
巖寶華巖陳彭添鵲源以其不可緒見也故特著於  
後子瞻既為之記又屬轍賦小詩凡二十章以繼摩  
詰輞川之作云

建德館

龍眠淥淨中微吟作雲雨幽人建德居知是清風主

墨禪堂

此心初無住每與物皆禪如何一丸墨舒卷化山川

華嚴堂

佛口如瀾翻初無一正定畫作正定看於何是佛性

雲鄉閣

清溪便種稻秋晚連雲熟不待見新春西風鄉自足

發真塢

山開稍有路水放亦成川游人得所息真意方澹然

鄉茅館

山居少華麗牽茅結淨屋此間不受塵幽人亦新沐

瓔珞巖

泉流逢石缺，脈散成寶網。水作瓔珞看，山是如來想。

棲雲室

石室空無主，浮雲自去來。人間春雨足，歸意帶風雷。

祕全庵

世道自破碎，全理未嘗違。溪山亦何有，永覺平日非。

延華洞

共恨春不長，逡巡就搖落。一見洞中天，真知世間惡。

澄元谷

石門日不下潭鏡月長臨細細溪風渡相看識此心

雨花巖

巖花不可攀翔蕊久未墮忽下幽人前知子觀空坐

泠泠谷

層崖落飛泉微風泛喬木坐遣谷中人家家有琴筑

玉龍峽

白龍晝飲潭修尾挂石壁幽人欲下看雨電晴相射



觀音巖

倚崖開翠屏臨潭置苔石有所獨無人君心得未得

垂雲泝

未見垂雲泝其如歸興何路窮雙足熱為我洗盤陀

勝金巖

置馬步巖間巖前得平地看蔬取行簾粗飽有遺味

寶華巖

團團寶華巖重重陰珍木歸來得商鼎試浴溪邊綠

陳彭漈

蒼壁立精鐵縣泉瀉天紳山行見已久指與未來人

鵲源

溪深龜魚驕石瘦椿楠勁借子木蘭船寬我芒屨病

次朱元晦韻題嚴居厚溪莊圖

宋陸游

鶴俸元知不療窮葉舟還入亂雲中溪莊直下秋千頃  
贏取閒身伴釣翁

題嚴居厚溪莊圖

宋朱子

平日生涯一短篷只今回首畫圖中  
平章箇裏無窮事要見三山老放翁

墨莊圖

五首

宋朱子

墨莊

詩書啓山林德義久儲積嗣世知有人  
新畬更開闢列軒

窗開深井泉窈窕千丈碧何幸且淵澄  
無勞遽心惻靜春堂

幽人本何心偶此翳環堵隱几亦何言光風遍寰宇

玩易齋

竹几橫陳處韋編半掩時寥寥千古意此地有深期

君子亭

倚杖臨寒水披襟立晚風相逢數君子為我說廉翁

野莊圖

三首  
有序

元王惲

承旨董公繪野莊為圖求諸賢題詠中齋草序以同人致亨晦叔撰銘以擬倫溢美恐未盡公臆之所在

若夫士君子出處固皆有命不可以遲速工拙為言  
然當得時行道靜退之心何嘗食頃而不在懷也以  
艱於自云必託物以表其志雖未能挂冠神武斂裳  
宵逝較之鐘鳴漏盡不已於行者猶賢乎已喜為賦  
詩初弗計其不自量也其辭曰

午橋吟醉平淮後商嶺鴻冥定漢餘正恐野莊歸未遂  
九重思治望新書

老筆鍊餘詩律細事機諳久宦情疎輞川圖上王摩詰

靜退為心是本初

寶珠換却杖頭鳩空見秋瓜憶故丘  
白首相看官舍底  
晚年心事轉優游

題董承旨野莊圖

元張伯淳

古人志道義但覺利祿輕朝市亦足隱何必求郊垞  
論心不論迹乃稱人物評董公廊廟器一門富簪纓  
石張漢世曹崔郭唐家聲筆下翻波瀾胸中韜甲兵  
黃閣政柄舉烏臺公道行征謀與治法和氣與威稜  
隨施無不

宜因物以賦形詞林日月間班高地望清公餘埽俗軌  
窗草階苔青樓臺雖無地詩禮勝金甌田園雖荒薄松  
菊還欣榮有時論國事膽張日增明使公遯江湖秉心  
亦朝廷所志真在隱非必身歸耕野莊視綠野他年定  
齊名

題張季雲先生山莊圖

三首

元王惲

儒將風流素所期兒時幾讀霽雲碑誰能更繼中丞後  
喜對張卿賦此詩

却馬巖居是素懷  
莫嗟終老未曾諧  
天教一段幽清氣  
散作恩威震兩淮

思長本與風雲會  
山迴空圍水竹幽  
說似野猿亭際望  
建封勲業在徐州

雨後山莊圖

元范梈

川容麗過雨  
百谷會新流  
溪路凌高轉  
佳木鳥鳴幽  
我田橫岫下  
黍稷歲可收  
不謂有生意  
乃復見將秋  
時從野老飲  
歡語載道周  
宇宙無終極  
此外更何求



題莫氏山莊圖

元黃潛

旋移小隱傍南峰，遠有咸平處士風。  
山態近人猶偃蹇，湖光無雨亦空濛。  
行春杖屨時時到，臨水軒窗面面通。  
別作新亭供戲劇，青帘搖曳杏花中。

題玉山中錢舜舉畫五柳莊圖

元張天英

飛泉屋後銀河縣，孤松屋上蒼龍眠。  
四山無數白雲出，好柳五株當門前。  
葛巾丈人步其下，悠然別有山中天。

題梅莊圖

明華幼武

聞說幽棲甌社湖只栽梅樹遶儲胥枝橫暮雪春回早  
香滿寒庭月上初五柳門前元亮宅百花潭北少陵居  
歲寒心事清無比寫入丹青意有餘

題汪季路太丞魏野草堂圖

宋 楊萬里

汾陰西祀告昇平四海無波鏡樣清乞與幽人好風月  
萬山裏許聽泉聲

題橋南堂圖

宋 陸游

平生不識橋南路聞道清流帶煙樹今朝開卷一欣然

恍若身親到其處徐郎獨立疑如山招不能來麾不去  
舊居萬瓦碧浮煙結茅却就橋南住雪盡春來水似藍  
想君清歛釣魚菴道上紅塵高十丈斷無一點到橋南  
題武教授峨嵋山谿堂圖  
元王惲

野水林塘淡欲秋日長  
矰繳在沙頭故山咫尺峨嵋外

未礙因人作遠遊

西郊草堂圖

四首為從  
子豈作

元虞集

故家東郭百花洲梅柳西郊總舊遊  
賢子獨知懷土念

結廬為擬草堂幽

早晚東吳賈客船直歸萬里畫橋邊寄肯儘有詩人在  
忍向園中看數椽

草堂在處即西郊巴嶺還如雪嶺高但有好孫能力學  
不愁老杜不春遨

野梅官柳頗依依酒債尋常七十稀莫遣錦溪賢姪覺  
恐愁安樂不思歸

題劉生庸道五莊草堂圖

元貢師泰

南北兩峰相對青萬竿修竹一茅亭何時共坐西湖雨  
白髮篝燈講六經

題良常草堂圖

元倪瓚

結屋正臨流水開門巧對長松為待神芝三秀移居華  
蓋西峰

韋羌草堂圖

元倪瓚

韋羌山中草堂靜白日讀書還打眠買船欲歸不可去  
飛鴻渺渺碧雲邊

陳履元畫玉山草堂

元鄭元祐

故人陳孟公辭如春雲氣如虹畫法師海岳山如騫鵬  
樹如龍騎箕上天二十載有子黠鼻畫極工驚蛟噓雲  
海浪白離鸞照水巖花紅皴鱗張鬚聳鬱磧底松中有  
一畝幽人宮石牀支頤晚飛瀑意遠欲託冥飛鴻我欲  
從之不可得青山萬疊金芙蓉

題錢伯珍所藏草堂圖

元釋良琦

錢郎讀書性閒雅草堂隨處卜雲林周顒不遂山居志

梅福仍兼吏隱心  
玉洞桃花春霧溟  
石田芝草暖雲陰  
礪西一逕通深竹  
還許支公日見尋

徐雪舟為畫藍礪草堂圖

明  
藍智

碧草連書屋  
蒼山對畫圖  
鶴巢秋樹小  
漁艇夕陽孤  
野色晴初遠  
溪雲淡欲無  
浮查倚磐石  
把釣任潛夫

題彭氏背郭草堂圖

明  
劉崧

日薄金華嶺  
雲深白石塘  
茅茨元背郭  
水竹自成鄉  
圖畫看逾好  
登臨興不忘  
門前雙杏樹  
葉葉是秋霜

題黃典籍東州草堂圖

明 陳思孝

東州州上野堂幽卷幔湖山翠欲流  
京國到來鄉思遠  
白雲黃葉夢中秋

趙松雪怡樂堂圖

贈善夫  
副使

元 鄧文原

一榻悠然樂事多  
四時風景復如何  
遠溪水色清流玉  
排闥山光翠擁螺  
靜裏研朱將點易  
醉中邀月鼓琴歌  
知君所好無塵趣  
肯許吾儕見訪過

題趙松雪怡樂堂圖

元 張雨



幽人結屋傍江干，怡樂名堂只數間。  
黃鳥隔簾詩夢醒，紫鱗供饌釣舟還。  
簷前景色春常在，柳外柴門晝不關。  
誰識箇中真樂處，陶然天地一身閒。

題九靈山房圖

元 愛理沙

夢裏家山十載違，丹青咫尺是邪非。  
墨池新水春還滿，書閣浮雲晚更飛。  
張翰見機先引去，管寧避亂久忘歸。  
人生若解幽棲意，處處林丘有薜薇。

九靈山房圖

元 丁鶴年

九靈別業何年到聊作新圖寄所思幽谷白雲晴窈窕  
高簷翠樹曉參差輞川已入王維畫韋曲仍傳杜甫詩  
咫尺相望成萬里臥遊心事許誰知

題五龍山房圖

明僧宗泐

剡中東南奇若人緇侶勝一住忽十年禪房得深靜高  
扉敞重巖修橋入危磴林端識名香水際聞清磬微茫  
度雲壑掩映披華逕長松支遶吟磐石曇猷定別來幾  
夢思游塵生塵柄晨窗對新圖蕭條發孤咏

題唐子華畫王師魯尚書石田山房 元張翥

秋水橋邊紅葉林數家  
茆屋傍青岑岡頭種玉  
朝煙煖隴上鉏雲宿雨  
深摩詰輞川宜入畫少  
陵韋曲自成吟東籬歲  
晚來同煮應許山中道  
士尋

題黃都事仲綱山居溪閣圖 二首 元虞集

出山作官十載餘聊託筆  
墨懷幽居連雲一一列  
眉黛細雨往往逢樵漁  
鄰家父老每載酒隔屋  
弟兄皆讀書我久居山  
不待畫獨念稚子扶犁  
鉏

閣前流水秋愈深故人東來還見尋方舟直過彭蠡澤  
把釣坐對香爐峯雲中煙樹差可辨江上鄉關誰與吟  
我欲芳蘭寄遠者日暮天際多輕陰

王叔明為陳惟允天香書屋圖

元黃公望

華堂敞山麓高棟傍巖起悠然坐清朝南山落牕几以  
茲謝塵囂心逸忘事理古桂日浮香長松時向媚彈琴  
送飛鴻柱笏來爽氣寧知采菊時已解哦松意

題劉生庸道竹林書室圖

元貢師泰

劉生讀書竹林下滿耳金石聲琅琅翠陰碎落日當戶  
緗帙亂翻風滿牀中夜蛟龍神變化清時鸞鳳瑞文章  
此君標致誰能寫一幅雲煙墨數行

竹谿草堂圖

為黃克文題

元舒頔

清谿谿上竹無數愛竹移家竹林住階前老竹鏗玉聲  
秋夜讀書霑竹露書聲繞屋雜竹聲竹色侵書助書趣  
竹根箇箇長龍孫竹上鸞鳳亦來聚有時攜琴陪竹彈  
兩袖清陰分竹翠雲梢月榦竹弄影杖竹尋詩過橋去

平生性癖亦愛竹不問主人造竹所君不見一筇投陂  
忽變化萬卷蟠胸勝插架

鳴山書舍圖

為黃君  
伯淵賦

明  
高 啓

伯鸞嚮春地井臼有遺跡之子學幽棲託蹤在林石清  
風竹林曉片月蘿逕夕遙想一齋空圖書滿牀積

蜀山書舍圖

明  
高 啓

山月蒼蒼照煙樹碧浪湖頭放船去隔林夜半見孤燈  
知是幽人讀書處

蜀山書舍圖

明徐貴

山水幽深處閒居此地曾傍花春晏客看竹午逢僧雲  
樹尋新咏巖巒憶舊登兵塵今間阻對畫思難勝

竹雪書房圖

為畫士戴文進題

明楊榮

戴君舊業家錢塘幽齋剩種青筍簾冰森玉立鬱蕭爽  
珮珂時動音鏗鏘一林遙接淇園綠萬个如臨渭水曲  
涼宵白晝風月清翠影重重覆書屋四時佳致迥不同  
况茲清絕當嚴冬朔風吹雪滿空下凝梢綴葉相玲瓏

素娥冉冉來雲表  
皓鶴翩翩舞林杪  
是時掩卷一凭闌  
清興滿襟應不少  
自從寄跡京華地  
翹首山房想初志  
陽春桃李任紛紛  
勁節貞心自無異  
何人為君寫此圖  
故鄉景物渾不殊  
興來展玩對立久  
一點塵埃牕外無

題李景昌竹間書舍圖

明于謙

萬玉蕭森遶四簷  
坐來惟覺雨纖纖  
小牕展卷循環誦  
古鼎焚香取次添  
爽籟隨風來淨几  
清陰和月度疎簾  
應知此地藏修者  
早晚蜚聲不久淹



柳塘書舍圖

明 李德

遠山出白雲近水明秋色煙波漫浩浩日暮歸舟急隱約叢薄間茅茨倚蒼石中有柳塘翁看看似相識

題蔡文翰墨溪書屋圖

明 廖道南

靈源接銀漢細繞楚王臺竹色侵簷密桃花映戶開草玄含妙思守黑入幽裁誰識臨池興張芝有儔才

題孺山書屋圖

明 王世貞

石田老人富丘壑湖雨嵐煙筆端起江南佳麗到不乏

吳興諸山若箇是書聲雜出飛瀑外高枕時橫白雲裏  
人云絮酒來南州此山名孺成千秋尚書讀書此山頭  
書成出柱中原天歸來顏玉圍腰圓冰心不媿南州賢  
出山住山俱偶然有足肯踏終南巔

題東洋書屋卷

二首

明

王世懋

遙聞支伯在滄洲天外蓬壺似可求  
敲枕白雲東盡處驚濤一夜海門秋

西北天傾水欲東吾廬何在半浮空  
看來萬里扶搖境

盡入蓬牕偃息中

倣子久秋山書屋

明李日華

雲氣堆中結屋樹陰薄處攤書廿載養成懶骨閉門不  
拜新除

龍門茶屋圖

元倪瓚

龍門秋月影茶屋白雲泉不與世人賞瑤草自年年上  
有天池水松風舞淪漣何當躡飛鳧去采池中蓮

石田茅屋圖

明解縉

石田茅屋歸來計長日呼龍種玉芝高臥熟眠應不忘  
五更風雨道塗時

題伯穎雲林茅屋圖

明藍仁

中林避世士茅屋一間雲雨笠尋芝術晴牕究典墳竹  
深羊仲至瓜熟邵平分但有卑棲處長隨鹿豕羣

題徐都憲小邨竹屋卷

明李東陽

藹藹水中邨灑灑屋上竹廛居遠山市屣脫去塵俗朝  
看碧山夾夕泛晴波綠江湖有襟帶冠屨無拘束昔聞

東吳老本出南州，族封非渭川戶乞。豈鑑湖曲溪山舊業，在圖史清風續華躋。歷臺省雅尚在林谷，夢寐三十年此邨。還此屋宦途復傾蓋，佳畫時秉燭指點入丹青。依稀過江麓，感今復懷舊。歲月如轉轂，儻遂江南遊。鄰哉我當卜。

題弋陽巖山精舍圖

元素 桷

紅塵落青山，飛瀑遽洗之。孕此巖中居，寒膏漾淪漪。白雲偉衣冠，修松古髭眉。書聲出虛牝，杳杳空中篴。桃源

有神界天光固幽機一為漁父游妙筆工研窺至今武陵郡山水傳清暉

吳儁仲傑橫河精舍圖

元張翥

橫河精舍誰所居豐城隱者吳仲傑是中林壑特幽勝一幅劉權畫尤絕遠山數曲重復重炊煙一邨樹叢叢嵐光雲氣紛滉漾盱水汝水遙相通近山什伯青匝匝峰底斜穿鷓鴣峽跳波直下却洄漩怪石截斷雙流合竹牕桂棟溪之隅過門好客無時無溪魚長肥酒長熟

撥棄世務談詩書  
梧川春雨草木長  
櫟塘耕稼仍膏壤  
鉏翁牧子行唯諾  
沙鳥風帆自來往  
獨不見陶縣令松  
菊園又不見杜陵  
老桑麻田人生得  
此不歸去有如頭  
上之青天傑乎傑  
乎吾羨汝毋負山  
中故人招隱篇

賦德機荆南精舍圖

元倪瓚

溪上田園定有無  
愁將歸思畫成圖  
春林寂寂花開落  
風牖泠泠鬼嘯呼  
尚有流泉悲夜雨  
已荒幽徑入寒蕪  
何當一舉同黃鵠  
未覺山川路鬱紆

上虞魏氏湖上精舍圖

元陳樵

湖上蘭舟水上亭有時水漲與階平  
亭前古柳經春弱  
門外孤洲昨夜生  
海氣遙連育王塢  
蜃樓半入會稽城  
山陰道士攜琴至  
寫盡風聲到水聲

虎丘老僧有竹林精舍文伯仁為圖之王履吉書  
疏於後余游竹林僧出示此卷履吉下世已三  
十載矣為之憮然因成此詩

明王世貞

山僧業靜者  
翛然無世氛  
朝疏淇澳雨  
暮浣瀟湘雲  
老



可湖州筆為竹寫清芬況有王子猷英標冠人羣自言  
讀書處何可無此君我來憩其下流颺散餘醺其人不  
可作太息讀遺文新粉含幽月蒼翠鬱紛紛截作山陽  
笛淒涼安可聞

題曹氏春江雲舍圖

元華幼武

富春江上曹孝子結屋深居白雲裏重重簾幙護春暉  
不出庭闈奉甘旨門前江水碧泱泱屋外峰巒紫翠光  
山高水闊意無盡堂上慈顏日月長棠棣相輝萼韡韡

蘭玉森森映階砌  
爛斑新筍帶煙鏡  
雪白江魚隨網起  
綵衣歡舞四時春  
世上之樂無其倫  
青雲立志為親顯  
衮衮公侯來逼人  
干戈滿地尚酣戰  
客袂不忘慈母線  
暮暮朝朝望白雲  
寸心只願長相見

題朱澤民荆南舊業圖

明高啓

睢陽醉磨一斗墨  
夢落荆南寫秋色  
太陰垂雨尚淋漓  
哀壑迴風更蕭瑟  
楓林思入煙霧清  
湖水愁翻浪波白  
溪上初逢野老航  
山中遠見先生宅  
秫田半頃連阡區

茅屋三間倚蘿薜僧來看竹乘小輿客去尋苓借高屐  
任公臺下石可坐周侯廟前路曾識虎跡時留暮苔紫  
蛟氣或化秋雲黑城郭當年別已久風塵此日歸不得  
落日書齋半壁明畫圖臥對空相憶

為黃伯昂題君山別業畫卷

明程本立

畫圖林壑起雲煙使者高懷寄靜便背郭真成浣花屋  
看山如坐洞庭船柴門黃葉鄰僧埽石徑蒼苔野鹿眠  
如此故巢勞遠憶只應頭白是歸年

御定歷代題畫詩類卷一百十五

欽定四庫全書薈要

御定歷代題畫詩類卷一百十六目錄

器用類

題敬器圖

唐劉禹錫

崔五六圖屏風各賦一物得烏孫佩刀

唐李頎

李兵曹壁畫山水各賦得桂水帆

唐李頎

題畫帆

明葛孔明

觀楊之美盤車圖

宋梅堯臣

盤車圖

宋歐陽修

畫車

宋蘇軾二首

題宗子趙明叔盤車圖後

宋饒節

盤車圖

元虞集

雪山盤車圖

元薛漢

郭熙盤車圖

明謝承舉

題宋院人畫盤車圖

明劉績

輓車圖

元吳師道

題蓮葉舟圖

元程鉅夫

酒船圖

明韓宜可

竹素圖

明楊基

同原甫詠祕閣藏古器圖

宋劉叔韜

題元章研山圖

元張雨

滄浪池硯圖

明王祿

題翰墨十八輩封爵圖

元任士林

周文矩雷劍化龍圖

元王惲二首

雙劍圖歌

元傅若金

樓光遠家觀宋綬景德鹵簿圖

元吳萊

題襄縣張醫人所藏續弦圖

明王鈞

題蘆花被圖

元貢師泰

詠秦淮妓王易容百花畫衣因新都謝少運索和

明陳繼儒八首

風鳶圖

明徐渭十首



欽定四庫全書薈要卷一萬九千二百二十四

集部

御定歷代題畫詩類卷一百十六

器用類

題敬器圖

唐

劉禹錫

秦國功成思稅駕  
晉臣名遂歎危機  
無因上蔡牽黃犬  
願作丹徒一布衣

崔五六圖屏風各賦一物得烏孫佩刀

唐

李頎

烏孫腰間佩兩刀，刃可吹毛錦為帶。  
握中枕宿穹廬室，馬上割飛翳。  
蝟塞執之魍魎，誰能前氣凜清風。  
沙漠邊磨用陰山一片玉，洗將胡地獨流泉。  
主人屏風寫奇狀，鐵鞘金鏤儼相向。  
回頭瞪目時一看，使予心在江湖上。

李兵曹壁畫山水各賦得桂水帆

唐

李頎

片帆浮桂水，落日天涯時。  
飛鴈看共度，閑雲相與遲。  
長波無曉夜，泛泛欲何之。

題畫帆

明

葛孔明

蓬飄萍聚任西東  
駭浪驚波浩淼中  
正是已平秋漲後  
碧天無際挂高風

觀楊之美盤車圖

宋梅堯臣

谷口長松葉老瘦  
澗畔古樹身枯高  
土山慘愴遠復遠  
坡路曲折盤車勞  
二車迴正轅接軫  
繼下三車來嚶嶙  
過橋已有一乘歇  
解牛離軛童可哂  
黃衫烏巾驅舉鞭  
經險就易將及前  
轂輪傍側輻可數  
蹄角攬錯行相聯  
古絲昏晦三尺綃  
畫此當是展子虔  
坐中識別有公子

意思往往疑魏賢子虔與賢皆妙筆觀玩磨滅窮歲年  
塗丹抹青尚欺俗旱龍雨日猶賣錢是亦可以祕疑亦  
不可捐為君題卷尾願君世世傳

盤車圖

宋  
歐陽修

淺山嶙嶙亂石矗矗山石礲聲車碌碌山勢盤斜隨澗  
谷側轍傾轆如欲覆出乎兩崖之隘口忽見百里之平  
陸坡長坂峻牛力疲天寒日暮人心速楊襄忍飢官太  
學得錢買此纔盈幅愛其樹老石硬山回路轉高下曲

直橫斜隱見妍媸向背各有態遠近分毫皆可辨自言  
昔有數家筆畫古傳多名姓失後來見者知為誰乞詩  
梅老聊稱述古畫畫意不畫形梅詩詠物無隱情忘形  
得意知者寡不若見詩如見畫乃知楊生真好奇此畫  
此詩兼有之樂能自足乃為富豈必金玉名高貴朝看  
畫暮讀詩楊生得此可不饑

畫車 二首

宋 蘇軾

何人畫此隻輪車便是當年鼓篋圖上易下難須審細

左提右挈免踈虞

九衢歌舞頌王明誰惻寒泉獨自清  
賴有千車能散福化為膏雨滿重城

題宗子趙明叔盤車圖後

宋 饒 節

跌宕平生萬里程盤車一展老心驚  
溪昏樹暗牛爭力似聽當年風雨聲

盤車圖

元 虞 集

大車轉轉牛駕輓西望太行雪千尺  
往時飛輓實長安

百兩仰關過阡陌亂流十里九屈曲水濺車箱沙沒轂  
前呼後應日云暮王事有程車下宿旂旐央央昔臨洛  
東南會期出方嶽侯伯有位賦有差載幣瞻迎來若若  
君不見海艘百萬乘天風京坻連雲多腐紅天子視朝  
大明宮千乘萬騎來何雄

雪山盤車圖

元薛漢

車焞焞石逕瑩确輪欲摧疲牛分寸挽莫前前車後車  
相逐來大府城門倚天開羣山雪深白皚皚卒夫鞭牛

凍墮指轉輸號令如風雷官中委積等塵土黔黎膏血  
無復回君不見明時屢散粟與帛桃林之牛亦悠哉不  
知何代畫此景我自一見令心哀

郭熙盤車圖

明  
謝承舉

東車上岡西車下輓力駕牛如駕馬後有一車方渡河  
泥深水寒將奈何來車人與去車語前途山高石齟齬  
千里百里多險阻虎狼縱橫皆逆旅好歸來守鋤杵

題宋院人畫盤車圖

明  
劉績



大車盤盤牽不住小車碌碌推還去上阪下阪日千迴  
不離太行山側路吳鹽蜀米塞滿箱烏犍耳濕筋力強  
商人重貨不畏虎飯牛夜夜宿車傍妻孥不須念行旅  
橐中有金皆樂土星餐露櫛逐隊行但願利多無所苦  
道傍往來多折軸誰人肯戒前車覆

輓車圖

元  
吳師道

短轅長馭後先驅逐利奔名恣所如落日中原天萬里  
我貧正坐出無車

題蓮葉舟圖

元程鉅夫

如此風波惡舟中坐晏如此時不經濟借問讀何書

酒船圖

明韓宜可

春波橋頭水半竿畫船如馬觸狂瀾平生常恨江湖小  
醉臥不知天地寬隔岸好山青隱隱環洲芳樹綠漫漫  
懸知賀監歸來日一曲晴光五月寒

竹素圖

明楊基

百尺飛樓似石渠牙籤五色照牕虛平生不惜千金費

喪亂猶存萬卷餘秦火已來皆斷簡楚經之外總閑書  
晴雲滿榻芸香散應與諸郎校乙殊

同原甫詠祕閣藏古器圖

宋 劉叔巖

黃占金寶氣天瑞告成功績事今時絕書文自古同  
培鈎記巫錦按刻異柏公塵世無由覩崑山策府中

題元章研山圖

元 張 雨

南宮米老書無敵同盟亦有薛河東研山自昔闕清賞

石友令人拜下風華蓋天壇承露潔月巖空洞與天通

絕憐古學龜城叟一一題詩取次工

滄浪池硯圖

明王禕

滄浪池水碧生春當日臨池玉作人  
故物流傳遺澤在龍泓鳳味未為珍

題翰墨十八輩封爵圖

并序

元任士林

翰墨十八輩皆几案間不可闕一之物上標封爵下  
圖其形旁書贊語殊有史臣之體余觀之不去手畫  
筆精妍疑亦島外人所製詩題其左

公子裝車從楚國十九人行一不足上階卒賴毛先生  
招手相呼公錄錄邇來翰墨十八人一日受封列華物  
世上空成孺子名論功却笑中書禿人生慎勿為事先  
乞留足矣張良獨

周文矩雷劍化龍圖

二首

元

王惲

用底幽光見斗間張華腰領不勝寒躍淵又作雙龍去  
在晉當為變怪看

飛躍陶梭化葛筇潛龍無跡與神通披圖點勘延平事

又在雷公劍室中

雙劍圖歌

元 傅若金

莫邪干將古神劍得水化作雙龍翔斗間寶氣入江滅  
波裏金鱗翻日光道人筆鋒如劍利亦能化龍致神異  
黑風鼉負濤欲立白日陰陰雨將至忽然逢之不敢窺  
爪甲雲氣常淋漓便愁中夜雷霆怒兩龍乘雲盡飛去

樓光遠家觀宋綬景德鹵簿圖

元 吳 萊

東朝盛文物四海極豐富粉飾郊祀間馳驅漢唐舊奉

常夙有掌鹵簿列前後車鈴麾飛黃戟盾服錯繡啟肱  
龍虎動扈衛駕騶騶遙嵯峨屹丘岳灼爚羅星宿陳兵吉  
利隊擇馬駒駝殿嚴須呵八神喜欲抃百獸祖宗所繼  
承宇宙徧包覆上公敬執籙天子親獻酎靈光旂旗林  
纓典禮樂囿威儀一以整瑣碎無不究時惟正垂拱國  
幸息戰鬪玉策恐人聞帛書疑鬼授紛紜務欺阿制作  
窮刻鏤老幼咸駭奔穹元總歆臭中誠乃根本外貌特  
膚腠封寧重砥繩饗或貴型餽居安昧危機致治起亂

寶文華終耗財武弱益招寇雖然喧一朝孰得燕末胄  
五輅忽已沒三京杳難救惜其初討論盍不返樸陋臨  
風披此圖歎息我呂綬

題襄縣張醫人所藏續弦圖

明王鈍

伊人在空谷灑落非塵襟寫懷無俗物手摩嶧陽琴況  
有芝蘭客賞茲山水音松風起坐隅寒泉瀉遙岑擘絲  
忽斷絕愴彼聽者心安得鸞膠續一洗桑間吟

題蘆花被圖

元貢師泰



秋深江上白蒙茸野客分來一色同酒醒孤篷卧明月  
帳寒老屋不禁風羽毛乍聚搏空鶴蹤跡真成踏雪鴻  
夜半何人吹鐵笛夢魂疑在楚江東

詠秦淮妓王易容百花畫衣因新都謝少運索和

八首

明  
陳繼儒

歲蕤花葉雜花鬢百和香風引六銖借得畫眉京兆手  
不須辛苦繡羅襦

越剪吳刀碎蜀羅墨花新蘸酒花多若非太華峰頭過

卷一百一十五  
那得衣裳是芰荷

綠絲紅線暗纏綿  
綵繪花文著意鮮  
莫向尊前輕斷袖  
連枝並蒂得人憐

碧雲白練疊空青  
小逗風前去後停  
忽地一聲環珮響  
鳥來只道護花鈴

春光如酒膩春衣  
五色玲瓏護粉肥  
一自郊原曾鬪草  
舞衫猶帶落花歸

卷衣香霧紫氤氲  
恰稱儂家白練裙  
不是從來好奇服

生花枯管未曾焚

腰瘦羅纖夜色闌  
煖含花氣鬪春寒  
教坊新製王家錦  
不織回文織合歡

琵琶街上月如霜  
巷口高高合抱楊  
若問秦淮新女弟  
逢人盡說畫衣王

風鳶圖

十首

附錄

明

徐渭

柳條搓線絮搓綿  
搓夠千尋放紙鳶  
消得春風多少力  
帶將兒輩上青天

我亦曾經放鵝嬉今來不道老如斯那能更駐遊春馬  
閒看兒童斷線時

縛竹糊腔作鳥飛崩風墜雨爛成泥明朝又是清明節  
鬪買餠糖柳市西

江北江南紙鷁齊線長線短迴高低春風自古無憑據  
一任騎牛弄笛兒

邨莊兒女競鵝嬉憑仗風高我怕誰自古有風休盡使  
竹腔麻縷不堪吹

春來偏與老人讐腰膂如弓項領柔看鷄觀燈都好景  
正難高處去擡頭

天台饒舌罵豐干何事吟鶯巧弄搏昨夜風餘收墮筏  
喚回拾得換寒山

鶯長線短欲何之萬丈無由辨得斯瞥見游絲天正午  
寸搓紙撚釘書時

此物等為芻狗草此飛等是土龍泥東風自古西吹去  
不是吹儂合向西

馬添鴿簫與膏焚整隊紅雲過玉真何處鄰姬不停織  
細聽燈火理箏銀



御定歷代題畫詩類卷一百十六



總校官庶吉士臣侍朝

校對官庶吉士臣徐如澍

謄錄監生臣陳增

謄錄監生臣張孝基

欽定四庫全書薈要

集部

御定歷代題畫詩類卷一百十七

八

詳校官原任主事臣李斯咏



欽定四庫全書薈要

御定歷代題畫詩類卷一百十七目錄

人事類

獻百花洲圖上陳州晏相公

宋范仲淹

觀韓玉汝胡人貢奉圖

宋梅堯臣

題曹仲本出示譙國公迎請太后圖自肅天仗以

下皆紀畫也

宋楊萬里

蕃王獻寶圖

元柳貫

題書船入蜀圖送黃尚質赴夔州蒙古教授元傅

若金

光山尹孔凝道作縣有聲鄉人為圖元馬祖常

題蔣習之春歸得意圖明徐賁

罷直圖明練子寧

題王顯宗巡歷圖明貝瓊

題畫送高博士使高麗明丘濬

題畫送陳明遠赴丹稜令明吳寬

題鳳凰集圖為陳德清應召

明王世貞

為張四太學題畫寄少司成范公

明王世貞

奉敕稱賀圖

明王世懋

兩承恩命圖

明王世懋

班師懷來圖

明王世懋

王公拜相圖詠

明朱存理

題焦白圻畫其父奉禮府君夜直詩意圖

明王逢

為李郡伯題喜祝三公圖

明李維楨

徐吏部父子朝天圖

明焦竑

題東溟父子趨朝圖

明顧清

顏總戎鎮朔巡邊圖

明葉盛

題好溪圖送憲使黃繼先

明孫炎

題雙喜圖送馬勝宗從昌平侯出鎮宣府

明劉溥

題畫送同年高穎之冊封黃州

明俞泰

六老朝天圖為陸石涇中丞賦

明廖道南

觀風圖為楊道長題

明廖道南

題楊廷宜侍御手卷花縣鳴琴

明傅珪

題畫送王幼度計偕

明董其昌

題郭祥鄉飲酒圖

元朱德潤

瓊林醉歸圖為同年長垣李溥作

明丘濬

吳將軍轅門夜宴圖

明邊貢

鹿鳴燕會圖為旌德江浦貢士賦

明程敏政

瓊林醉歸圖

明陸鈇

謝許判官惠茶圖茶詩

宋大同

贈臨江簡壽玉二首簡攜王仲顯使君書來謁并

示孔毅甫夢蟾圖今廟堂五府皆有題字

宋范

成大二首

題劉後邨所跋楊朴移居圖

宋許月卿

題張天民先生移居圖

元成廷珪

自題移居圖

明陳道永

荆氏周急圖

元王惲

清白圖為何掾舜舉賦

元王惲

題戚子雲五雲圖

元牟巖

夢會圖

元牟巖

題露臺夜炷圖

元揭祐民

題授經郎獻書圖

元張雨

焦永功桑梓圖

明劉三吾

二窮圖

明周用

題董望峰行春圖

明焦竑

為兒輩題折桂圖

明張鳳翼

題百子圖

明張鳳翼

為仲氏題夢筆生花圖

明張鳳翼

題扇面圖贈且翁叔

明張邦奇

呂繩宇兄余髫年交也為圖便面以見意

明李日

華



欽定四庫全書薈要卷一萬九千二百二十五

集部

御定歷代題畫詩類卷一百十七

人事類

獻百花洲圖上陳州晏相公

宋

范仲淹

灤下勝遊少此洲聊入詩百花爭窈窕一水自漣漪  
潔白憐翹鷺優游羨戲龜闌干紅屈曲亭宇碧參差  
倒影澄波底橫煙落照時月明魚競躍春靜柳閒垂  
萬竹排霜仗千荷卷翠旗菊分潭上近梅比海南遲  
岸鵲依人

喜汀鷗不我疑，綵絲穿石節。  
羅襪踏青期，素髮頻來醉。  
滄浪減去思，步隨芳草遠。  
歌逐畫船移，繪寫求真賞。  
緘藏獻已知，相君那肯愛。  
家有鳳凰池。

觀韓玉汝胡人貢奉圖

宋梅堯臣

時世重古不重新，破圖誰畫舊胡人。  
臂鷹捧盤犀判水，鐵鎖獅子同麒麟。  
翹翹雉尾插頭上，深目鉅鼻青搭巾。  
塗朱點綠筆畫大，筋骨怒露蠻祠神。  
茜袍白馬韓公子，從何得此來祕珍。  
定應海客遠為贈，中國未覩難擬倫。

公子自言吳生筆吳筆精勁瘦且勻我恐非是不敢贊  
退歸書此任從嗔

題曹仲本出示譙國公迎請太后圖自肅天仗以  
下皆紀畫也

宋  
楊萬里

德壽宮前春畫長宮內花開宮外香太皇頤神玉霄上  
都人久不瞻清光今晨忽見肅天仗翠華黃屋從天降  
一聲清蹕萬人看天街冰消樓雪殘北來又有一紅繖  
八鸞三駢金轂端輦中似是瑤池母鳳鳥霞裳剪雲霧

太皇望見天開顏萬國春風百花舞乃是慈寧太后回  
鑾圖母子如初千古無朔雲邊雪旗脚濕御柳宮梅寒  
影疎向來慈寧隔沙漠倩鴈傳書鴈難託迎還駟馭彼  
何人魏武子孫曹將軍將軍元是一縫掖忽攘兩臂挽  
五石長揖單于無訕辭奉歸慈輦如折枝功蓋天下只  
戲劇笑隨赤松蠟雙屐飄然南山之南北山之北君不  
見岳飛功成不抽身却遣秦家丞相嗔

蕃王獻寶圖

元

柳貫

皇天饗德親至仁四夷慕義悉來臣押奚兩番稱使者  
稽首自請輸庭珍梯航琛賫慙後至象犀珠貝充前陳  
髦蠻何由舍愛吝聖化如天能服馴仁柔義懷乃至是  
聲驅威懾非其真君不見周公居中秉周禮王會書成  
白環至按圖索驥豈不然貞觀興唐有畫傳

題書船入蜀圖送黃尚質赴夔州蒙古教授

元  
傅若金

楚客之官汎蜀船畫圖盈尺見山川九江樹色瀟湘外

三峽猿聲濫瀕前方譯漸通巴俗語國書新絕漢人傳  
豈無好事能攜酒問字時時集講筵

光山尹孔凝道作縣有聲鄉人為圖

元馬祖常

光山近在故山西樹滿江頭稻滿畦鄰屋讀書相教授  
社祠醉酒共提攜水牛礪角嫌耕淺野繭抽絲喜價低  
春雨行田無從吏獨騎齋馬畏青泥

題蔣習之春歸得意圖

明徐賁

簪筆親當白玉墀天顏有喜獨能知  
歸來匹馬花盈路正是春風得意時

罷直圖

明練子寧

草詔下金鑾宮槐白露寒紫駟驕不控  
明月在欄干

題王顯宗巡歷圖

明貝瓊

六月霜威見直臣繡衣玉斧大同巡  
山分駝脊高中土路折羊腸恐遠人  
今日邊戎應辟馮從來漢使獨埋輪  
白頭校字慙年少為客京華又一春

題畫送高博士使高麗

明丘濬

青旌懸翠旄，龍竿綴鳳尾。持出大明宮，搖搖向東指。  
氣節橫九秋，風聲揚萬里。坐使三韓人，快覩古君子。

題畫送陳明遠赴丹稜令

明吳寬

洞庭木葉起秋思，正是扁舟入蜀時。  
十里山城知卧治，卷簾清晝見峨眉。

題鳳凰集圖為陳德清應召

明王世貞

鳳凰出丹穴，萬羽相因依。今者集君庭，孤騫以徘徊。匪



為聽簫韶母乃攬德輝阿閣麗層霄雄鳴應朝暉肯學  
潁川守終貽鵲雀譏

為張四太學題畫寄少司成范公

明

王世貞

故人自許同張范手寫新圖托贈君蕙帳可仍天目色  
絳帷還似石頭雲磯邊罷釣絲綸在掌上揮毫雨露分  
儻問吳興王大令郡齋親識練為裙

奉敕稱賀圖

明

王世懋

闕下材官尺一馳陰山草木聖恩知單于歡喜頻看印

部落堅盟共立碑服匿稱觴胡伎樂穹廬習拜漢官儀  
何須禮在諸王上但道汾陽首自垂

兩承恩命圖

明  
王世懋

詔下螭頭護紫雲康侯蕃錫自明君封章屢貢褒充國  
恩澤多封薄冠軍金石家懸全部樂鼎彝名勒太常勲  
邊氓盡解吾祈父虎竹龍章世世分

班師懷來圖

明  
王世懋

偏師急擊渡渾河勒石燕然志不磨一騎材官傳露布

千金壯士飽休戈陰山北去空庭跡響水東流雜凱歌  
振旅何慙漢名將古來功是伐謀多

王公拜相圖詠

明朱存理

吳國才賢見兩元山川靈秀出璵璠先朝史錄趨宣召  
大郡編摩即討論車馬城西懷遠別經綸闕下沐殊恩  
緣知舊學應超擢還見官崇道益尊

題焦白圻畫其父奉禮府君夜直詩意圖

明王逢

露濕金莖月轉西  
披香太液淨無泥  
梨雲散盡千官影  
獨見桐花小鳳棲

為李郡伯題喜祝三公圖

明 李維楨

漢家貴重二千石  
守相每據公卿席  
紫庭引見賜駢蕃  
青史循良聲為奕  
帝鄉自是帝恩偏  
李公為守有二天  
絃歌春醉層城月  
桑柘晴飛萬井煙  
郡國高第誰堪擬  
超拜三公固然耳  
鷺溪絹寫三公象  
轉日回天公分量  
古來大臣慮四方  
五馬舊遊無相忘  
功名不損潁川郡

江漢摩挲召伯棠

徐吏部父子朝天圖

明焦竑

紫禁朝天拜舞同  
千門曙色隱瞳矓  
即看玉帛圖王會  
況復班聯似魯公  
春轉龍旂開羽仗  
日高仙掌麗芙蓉  
御屏隔座他年事  
青史班班有世風

題東溟父子趨朝圖

明顧清

先皇龍飛登俊英  
歲在庚戌君飛騰  
甲戌今皇臨大廷  
郎君接武振華纓  
尚書光祿郎而卿  
分曹右選參本兵

天門曉開日未昇紅霞紫氣繞觚稜玉街無塵青引繩  
冠裳佩履儼徐行前者長孺後元成小夫雅願止金籬  
君家世德遠有承華亭啟土紹嘉興貞元相君尤有名  
崑山婉孌谷水清詩書疊疊來雲仍粉如玉筍間瑤楨  
朝廷有道四海平鳳將九子不足驚畫師不憚理丹青  
我老猶能繼頌聲請君多買鵝溪絹

顏總戎鎮朔巡邊圖

明  
葉盛

鎮朔將軍熊虎姿幕府宏開當北陲太平天子日無事

正此邊巡閒暇時維時夏初迫春暮塞草青青出邊土  
行人貂裘且為備礮底層冰尚多洹東方雷動毛龍嘶  
前驅早已度磨笄鏐鏐健士三千輩錦繡攢風一色齊  
金符玉勅黃封厚高絰仍看印如斗令嚴人馬不敢譁  
寂寂柴門走雞狗狼山道側青嵯峨和風不搖嫺汨波  
最惜年時傷早暎邊戶其如疲苦何行行壯觀多奇絕  
萬壘居庸寒積鐵奮身真欲俯危巔看取鴻濛古時雪  
黃金宮闕望中深四陵劍烏垂雲陰中天白日照肝膽

清淚滿頤愁寸心結髮從戎今白首祇事明廷亦云久  
北門樞管猥區區欲報隆恩我何有馳驅肯辭行路難  
槍竿又復望長安酒酣叱咤出關去啁啾鬼哭淒風酸  
穹廬亂點牛羊道笑取駱漿暫充飽殺氣橫連獨石斜  
天聲震落三山小六丁一夜殺聲高血波曉漲龍門濤  
下勞陣前真意氣稍試新頒金字袍羣然衆山臨絕境  
野鵲野狐非一姓萬國車書保障中此鄉原號虞臺嶺  
虞臺西出又萁蔴處處濃香開野花亭堡重修不知數



時來借問耕人家楚漢區區事征戰今日皇家作畿甸  
幾度揚鑣下蔚州好事鄜生吁不見茫茫沙塞已塵清  
蕩蕩輿圖仰盛明父老戴香朝出郭鼓笳連路夜歸營  
由來上將先強識豈在論功在謀國干戈不動四方寧  
萬歲千秋奉宸極

題好溪圖送憲使黃繼先

明孫炎

君乘馬望君來括蒼下君乘舟望君來好溪頭好溪水  
生玳瑁魚好溪水生明月珠好溪水生青珊瑚使君來

此月再樞惟飲此水無一需使君之清水不如臨別贈  
君青絲轡隨君馬頭行萬里相思之心有如水

題雙喜圖送馬勝宗從昌平侯出鎮宣府

明 劉溥

遠隨金印出邊州早報平安入鳳樓剪取白羅飛繡影  
旗竿高挂敵人頭

題畫送同年高穎之冊封黃州 明 俞泰

翹首東南幾夕曛歸心時逐廣陵雲乘軒偶借天風便

喜讀黃岡竹外文

六老朝天圖為陸石涇中丞賦

明 廖道南

君不見媯皇鍊石成五色上扶天柱星辰列森羅璿緯  
環瑤宮璀璨銀潢含璧月又不見周公嘉石平兆民下  
懸邦紀象魏陳敷賁人文崇鼎呂明章物采重和鈞只  
今石涇人中龍光贊媯皇紹周公夙抱巖巖持大節孤  
懷磊磊耿清忠繫昔揚靈自吳越百代豪雄稱兩涘嘉  
禾挺秀白龍湫樵李流輝丹鳳穴士衡麗藻吐時芬德

輿雅操還越羣觀光上國英名著奏最東曹茂績聞倏  
忽迴翔棲太嶽握符仙館鳴天樂三十六巖翔彩鸞二  
十四澗喧笙鶴載辭南土遷東粵却倚中台司左轄炎  
海颺回遁川鰐嶺隅霾斂潛山狹適膺簡命撫湖湘斧  
繡威明拂曙光衡嶽崔嵬卿月朗洞庭潏潏德星祥獻  
春郢邸迎鑾馭萬乘齊驅肅飛翥親向行宮覲聖顏頻  
從便殿乘天語金宮貝闕仍繽紛龍飛鳳翔連卿雲陽  
春從岵北勝域啟運隆慶昭豐勲早秋江甸奉仙宴千

帆迅發周遭夾寵從玄丘護玉輜鬱葱紫氣蟠珠匣神  
龜赤馬拱稜恩乾樞坤紐繇靈原漢江東來走溟渤洪  
山西去接崑崙吁嗟石涇天下望荷茲寵異來天上晉  
畫文明朱紱華需雲霓渥彤弓賞坐令三楚咸澄清山  
祇允若淵后寧仰潤六符登泰階俯奠六合升降平猥  
予小子舊通籍爰涉于涇介如石降嶽恒驚嵩室神濟  
川期効商巖勩高堂對此南飛圖古松千尺五大夫願  
公三壽朋六老共壽斯世躋唐虞

觀風圖為楊道長題

明 廖道南

風采臺端第一流  
南巡今御李膺舟  
洞庭颺靜三湘霽  
衡嶽雲開萬壑秋  
都下埋輪聞直節  
殿中簪筆展嘉猷  
即看當宁延英俊  
五色祥煙照衮旒

題楊廷宜侍御手卷花縣鳴琴

明 傅珪

重重桃李縣衙深  
更對清流與碧岑  
自是日長民事少  
一簾花影伴鳴琴

題畫送王幼度計偕

明 董其昌

敢競營丘妙與真寒林能變曲江春看花帝里如看畫  
始信斯圖亦有神

題郭祥鄉飲酒圖

元 朱德潤

昔人好酒名雖在死灰萬劫誰能全我今悼昔復須飲  
翻恨不生中古前

瓊林醉歸圖為同年長垣李溥作

明

丘 濬

奉天殿上傳臚罷日照金門榜初挂中使傳宣勅大官  
明朝錫宴南宮下張天為幄雲為茵金盤犀箸羅八珍

宮花剪綵來中禁御酒分香出上尊鼉鼓掀天擂欲破  
梨園法樂喧相和妙舞清歌次第呈幻形奇技紛紜過  
承恩侍宴皆貴臣繡金孔雀銀麒麟焚香望闕北面拜  
共賀官家新得人白面青年三百五人似神仙氣如虎  
潛泉浮酒不知數兩袖翩翩欲飛翥瓊林宴罷日斜時  
馬蹄得意去如飛團團阜蓋空中舉短短絲鞭柳外揮  
微風不動香塵軟十二街頭簾盡捲衣裁草色碧將流  
旗拂杏花紅尚淺金環搖轡穩于車笑拍吟鞍不用扶



恥向平康問花柳還歸槐市枕詩書明日半醒扶醉起  
吮筆題詩謝天子就中醉者誰最豪中原才子長垣李  
吳將軍轅門夜宴圖

明邊貢

營門花發春酒香濃點酡酥炙黃羊美人胡歌健兒舞  
蠟鳳啼風月當午高簾飛幕絲吹騰觴波櫛櫛梁雲凝  
主人醉眠客不醒探兵枕戈戍煙靜

鹿鳴燕會圖為旌德江浦貢士賦

明程敏政

宴罷賓興日未斜頽然丰采動京華大鵬小擊三千里

雛鳳高騰五色霞  
秋月再分丹桂粟  
春風偏上紫荊花  
相期更寫瓊林會  
趁取才人兩鬢鴉

瓊林醉歸圖

明陸 錢

金羈細馬出明光  
碧色羅衣錦繡香  
行過玉河三百騎  
少年爭說李東陽

謝許判官惠茶圖茶詩

宋文 同

成圖畫茶器滿幅寫茶詩  
會說工全妙深諳句特奇  
盡將為遠贈留與作閒資  
便覺新來癖渾如陸季疵

贈臨江簡壽玉二首簡攜王仲顯使君書來謁并  
示孔毅甫夢蟾圖今廟堂五府皆有題字

宋  
范成大

蕭灘遠客扣田廬貽我讀書樓上書千里故情元共月  
錯吟多病故人疎

卷中圖畫袖中珍上有三階五朶雲白日青天光範路  
未饒蟾窟夢紛紛

題劉後邨所跋楊朴移居圖

宋  
許月卿

曾對君王已放還何須當道把漁竿使輶將宿人將避  
拗折漁竿趕入山

題張天民先生移居圖

元成廷珪

舊隱荆溪第幾邨手栽松檜至今存大茅峰下千年鶴  
遲汝重來問子孫

自題移居圖

明陳道永

故居恰好近新居舟過泥橋僅里餘行李只勞兩隻犢  
家藏唯見一囊書容人小徑無軒蓋飯客荒園有草蔬

雪夜相尋亦可問竹林深處是吾廬

荆氏周急圖

元王惲

九縣飈馳到杞天禾廬櫛比豈容全指困能繼前賢舉  
亦是農家識事權

清白圖為何掾舜舉賦

元王惲

傳家素有游鯨潔竊祿生憎碩鼠貪三考臬司如一日  
眼中何掾德無慙

題戚子雲五雲圖

元牟巖

一從鰲去波翻海夢斷蓬萊不可尋當日五雲依約處  
有人掩卷自微吟

夢會圖

元年 嶽

覺來猶記舊儀型趺坐無言月滿庭畢竟自因還自想  
不妨重舉夢齋銘

題露臺夜炷圖

元 揭祐民

赭紅清夜露臺香月冷銅人正耐霜心事意知惟密訴  
帝青天語近琅琅

題授經郎獻書圖

元張雨

侍書愛題博士畫日日退朝書滿牀奎章閣上觀政要  
無人知有授經郎

焦永功桑梓圖

明劉三吾

家住滄洲近析津奏聞金闕慰雙親山河一統昇平日  
桑梓連陰浩蕩春親舍舊為鍾秀地將門今見讀書人  
還家定展焚黃禮遙望天東拜紫宸

二窮圖

明周用

一窮圖者誰所圖老而獨他人亦有言有子萬事足孰  
不為父母我生胡不淑堆牀萬卷書無子誰與讀白頭  
東門吳得不吞聲哭鼎鼎徒百年回風掩雙燭再窮圖者  
誰所圖婦之寡由來父母心男婚女云嫁不幸生別離誰  
是無情者燕婉曾幾時掩目黃泉下姪子未分明白日沉  
長夜生女不生男誰與標石馬至今松楸雨清淚同霑灑

題董望峰行春圖

明焦竑

莫道閒門雀可羅行邊華髮媚春蘿自探鴻寶身偏健



遙指青帘興轉多方外定堪司馬老田間誰詫故侯過  
琵琶別有新翻調不唱平原奈樂何

為兒輩題折桂圖

明張鳳翼

聞道姮娥愛年少吾今已老少年身汝輩著鞭休落晚  
及時好作折花人

題百子圖

明張鳳翼

前榮長宜男後庭生益母大兒孔文舉小兒楊德祖森  
森竇桂何可擬垂垂海榴不足數房櫳瑞霤兆熊羆百

子聯翩多白眉輕煙暖護藍田玉微雨膏滋玄澗芝繞  
膝持觴競稱壽汾陽時復一頷之

為仲氏題夢筆生花圖

明張鳳翼

年來無夢入京華才盡文通敢漫誇但得池頭重賦草  
不須筆上更開花

題扇面圖贈且翁叔

明張邦奇

金莢雪竇高入雲西有萬頃田畇畇下頭莊邊香稻熟  
風景依稀如鹿門小舟棹入焚修橋釣絲搖曳風蕭蕭

槎湖新水綠於酒擬築糟丘千仞高

呂繩字兄余髫年交也為圖便面以見意

明

李日華

年少同學時里社酣杯酒游鞭共騁目處處迷楊柳廿  
載走風塵物態驚回首素心既不移水石盟依舊硯池  
徵繪事仍落搏沙手

御定歷代題畫詩類卷一百十七

欽定四庫全書薈要

御定歷代題畫詩類卷一百十八目錄

人事類

生日劉景文以古畫松鶴為壽且貺佳篇次韻為

謝

宋蘇軾

劉訥畫廬陵三壽圖求詩

宋周必大

詹仲信以山水二軸為壽固辭不可乃各作一絕

句謝之

宋陸游

題宋徽宗獻壽桃圖 元柳貫

題南山獻壽圖 明李陞

望雲祝壽圖 明丘濬

題萱草圖為從母張孺人六十壽 明吳寬

三姊壽七十以八月十三日生因題月兔圖奉賀

明吳寬

梅竹壽意圖 明程敏政

題榮壽圖 明傅珪

仙窟圖壽白都憲母

明周用二首

代題壽父母圖

明屠僑

題崆峒圖壽祝永明

明鄭鵬

丹陽尹來菲泉索題南峰圖為乃翁壽

明廖道南

恩榮雙壽圖為吳峰陳侍御父母賦

明廖道南

題雪巖圖壽麗卿乃翁

明廖道南

題彭宣慰壽圖

明廖道南

壽申封君歌題青鳥圖

明王世貞

題孟里圖壽尤母

明王世貞

題畫壽大參陽谷先生七十

明王世貞

為林子騰茂才題桃源圖壽

明王世貞

題靈椿圖壽卓徵甫光祿五十

明王世貞

題栢舟畫卷贈高母

明王世貞

為范母題晚節寒香卷

明王世貞

題張步兵懷椿壽萱卷

明黃相

題黃山煙樹圖為邵果齋內人壽

明焦竑



題李公子喬松圖稱壽尊君臨淮侯 明焦竑

題仙桃白鹿圖壽蔣參岳子徵 明張鳳翼

題扇壽愛蔬吳先生尊人 明顧清

賦蟠桃圖為張時震父母壽 明顧清

題畫松石為吳亦合壽 明李日華

題竹溪圖壽竹溪老人 明李維禎

題九如圖為高觀察四十壽 明董其昌

題百萱圖壽李本寧母太夫人 明董其昌

樂壽圖為潘百朋壽

明董其昌

嘉平十四日題寫古梅壽襟海丈

明李日華

韓參議家慶圖

元袁桷

張希孟嘉慶圖

元袁桷

秦元卿家慶圖

元馬祖常

題晉寧申氏家慶圖

元程鉅夫

贈別柯伯庸歸省親柯自龍虎來臨安邀予三茅

山中出示方壺所作東柯谷圖及翰苑諸名公

詩一帙且曰吾垂白之母在堂將歸省焉請與  
子別因賦此贈宋戴奎

題方壺子天台圖送曹士安省親還上清元丁復

題劉山長雪夜板輿圖元薩都拉

題胡伯衡飛雲圖元楊載

家山飛雲圖元程鉅夫

題潘叔寬望雲圖元貢師泰

望雲思親圖為王大使作元丁鶴年

題張伯源夢父還家圖

元張庸

題陳象之輿母避寇圖

元張庸

瞻雲圖

明廖道南

李氏奉新圖

元程鉅夫

題白華圖為本齋王公

元王壽衍

題白華圖為本齋王公

元湯彌昌

題白華圖為本齋王公

元陳方

題白華圖為本齋王公

元龔璠

欽定四庫全書薈要卷一萬九千二百二十六

集部

御定歷代題畫詩類卷一百十八

人事類

生日劉景文以古畫松鶴為壽且貺佳篇次韻為

謝

宋蘇軾

問子一室間寧有千里廓塵心洗長松遠意發孤鶴生  
朝得此壽死籍疑可落微言在參同妙契藏九籥故人  
有奇趣逸想寄幽壑霜枝謝寒暑雲翮無前却何須構

明堂未羨巢阿閣，緬懷別時語，復作數日惡。詩腴固堪餐，字瘦還可愕。高標忽在眼，清夢了如昨。君今噲等伍，志與湛輩各。豈待相願言，方為不朽託。子雲老執戟，長孺終主爵。吾當追喬松，子亦鄙衛霍。

劉訥畫廬陵三壽圖求詩

宋周必大

同辭宦路返鄉閭，兩驕驍中間以駕前後。顧瞻羞倚玉，支干引從偶。連珠三人不用邀，明月九老何妨續。畫圖從漢二疏，唐尹後相親相近。此應無

詹仲信以山水二軸為壽固辭不可乃各作一絕  
句謝之

宋陸游

春山

策蹇渡橋春雨餘  
亂山缺處草亭孤  
不知何許丹青手  
畫我當年入蜀圖

雪山

雪崦梅邨一徑斜  
茅檐烟火兩三家  
眼明見此幽栖地  
却恨吾廬已太奢

題宋徽宗獻壽桃圖

元柳貫

青鳥銜書昨夜來  
蟠桃如斗核如杯  
蓬萊殿上三千壽  
不及春風夢已回

題南山獻壽圖

明李暉

將軍落筆怪且雄  
能寫嵯峨萃律萬仞之奇峰  
模糊猶含太古色  
慘澹頗帶清秋容  
儼如蓬萊三山翠  
且重又如廬山五老削  
出金芙蓉  
千盤萬轉不可測  
恍忽雲氣隨飛龍  
下有衆壻之流泉  
上有偃蹇之長松  
松根羽人



顏色好抱膝盤院事幽討云是南極天邊之壽星遨遊  
先天後天老被以青霞裘蔭以白羽葆龜游綠沼沉滄  
波鹿放蒼厓食瑶草有鶴有鶴飛且鳴雪衣丹頂隨風  
輕兩鶴飄然入紫清一鶴獨立和以簫韶聲手拈雙青  
童載以白玉笙上朝三十六帝京五雲仙樂來相迎玉  
女投壺其聲錚錚白兔搗藥使人長生胡君欣得之喜  
氣何盈盈是時七月涼風生君來飲我黃金觥酒酣再  
拜求我歌須臾落筆雷霆轟五岳為之動三江為之傾

此圖足為仁者壽題以南山獻壽之佳名胡君胡君宜  
愛惜我歌歌罷千金值挂向高堂雪色壁夜夜虹光射  
天赤

望雲祝壽圖

明丘濬

昔賢望雲憶親舍雙目熒熒逐雲下今君望雲祝親年  
一心炯炯依雲邊舉頭見雲如見母獨立蒼茫凝睇久  
輪輪囷囷鮮且明浮光呈瑞表壽徵觸石遙從泰山出  
雨下土兮滋萬物有如春暉煦草心亦似凱風吹棘針

母恩如此莫可報望雲再拜情何任情何任意無已目  
極天高萬餘里越王臺上陽生時焦子初黃蟹螯紫高  
堂綺席倚雲張紛紛兒女羅酒漿就中獨少讀書子挾  
策多年遊帝鄉帝鄉迢迢歸未得對此佳辰應惻惻馳  
心直與雲天高恨不將身在親側蒼天漠漠雲悠悠雲  
色還如親白頭孝誠一念感穹昊雲影為之凝不流何  
事良工心亦苦筆端寫出心中語紅雲朶朶捧天庭白  
雲片片迷江樹紅雲影裏望白雲白雲如舊紅雲新裁

雲作衣雨為酒共祝君親千萬壽

題萱草圖為從母張孺人六十壽

明

吳寬

北堂慈母坐薰風萱草當階見一叢  
莫向洛陽看舊譜  
此花真是壽安紅

三姊壽七十以八月十三日生因題月兔圖奉賀

明

吳寬

橋頭水滿月流輝設悅高堂映彩衣  
節賀中秋今已近  
壽期百歲古尤稀  
門闌舊傍金獅壯  
圖畫新成玉兔肥

小弟相看今老矣願為煮粥正懷歸

梅竹壽意圖

明程敏政

羅浮仙人冰雪顏渭川君子青琅玕憑誰點染入毫素  
緋桃綠李空漫漫曉日高堂奉春酒燒筍翦香祝君壽  
願梅結子竹生孫長作山中歲寒友

題榮壽圖

明傅珪

江天遙識少微星閒閱乾坤八十齡高咏直追陶栗里  
幽居還傍晉蘭亭名知郡守非干謁誼重鄉閭足典刑

何事壽筵光彩異，新看雛鳳下青冥。

仙窟圖壽白都憲母二首

明周用

愛日留深景，高年共物華。  
宮箋瞻后月，帔錦鬱仙霞。  
紫誥頻封國，藍輿且近家。  
欲傳萱草賦，堂北漫看花。  
龍章五色照蠶絲，大郡高銜自昔時。  
績學郎君如父貴，承顏新婦得姑慈。  
瑤圖已見仙人屋，玉署仍傳學士辭。  
聞說中閨偕燕喜，為歌南國采蘋詩。

代題壽父母圖

明屠僑

聞說瑤池會事新鬱葱佳氣北堂辰青銅月滿明珠箔  
白髮莖疎照錦茵簫管鳳皇臺上侶兒孫蘭蕙圃中人  
風霜亦屢疑春色烏鵲年年渡漢津

題崆峒圖壽祝永明

明鄭鵬

吾聞崆峒山屹崒三萬丈星辰羅層巔雲霞罩蒼莽琪  
樹競芬芳石室廓弘敞伊昔廣成子於茲抱玄養日月  
參輝光天地同沆茫猗歟度關翁千載契心賞拂袖凌  
紫霄跨鶴遙相訪欣然許相從無極恣來往祝君真仙

姿襟懷多倜儻長謝軒冕榮亦澹聲色想諒是長往人  
不待智者獎慚予骨相凡齷齪墮塵網金光許共餐願  
言執鞭鞅

丹陽尹來菲泉索題南峯圖為乃翁壽

明  
廖道南

會稽名山天下無千巖萬壑相縈紆維南有峰積烟雨  
上應南極函靈圖獨羨茲圖分五嶽天風時來奏仙樂  
青鳥翩躚憶王母碧桃爛漫歌方朔方朔魁梧負俊才



文光璀璨輝星台三山海外祥煙繞五色雲中瑞氣迴  
儵見乘鳬儀漢殿御屏姓字天章綯遙獻南峰春霽圖  
虹橋萬里銀河轉

恩榮雙壽圖

為吳峰陳侍  
御父母賦

明  
廖道南

我聞陳氏漢有元方與季方太丘品藻流芬芳宋有堯  
咨與堯叟省華訓戒歸仁厚乃今亦有樸菴翁吳峰子  
仰植天綱俯入紀翁昔山中讀考槃春猿秋鶴恣盤桓  
耽幽偏訪湘園竹采秀仍纓澧蘭時惟孟光偕隱德

相敬如賓親稼穡縞衣如慮更辛勤草閣茅簷共棲息

嗃嗃儀形穆古風諄諄警誨抱精忠一經克永傳家澤

三命端期懋國庸自昔分符浙西麓萬峰矗立瞻天目

登巘恒歌岵岵篇望雲長効喬松祝結駟還乘御史驄

英英斧繡北臺東簪筆朝參邇英殿封囊夕達承明宮

即承簡命巡南土兩淮兆姓安如堵攬轡何須羨范滂

勒碑終見思羊祜矧逢綸詔覃敷恩紫誥飛章及里門

赫赫鹿冠輝老栢煌煌翬服映晴萱我時北上膺皇眷

招提樓閣羅清宴願乞南飛雙鶴詞置之堂上增歡忭  
我思古人為君賦太丘省華昌胄祚君子移孝為忠貞  
憲度千載萬載勲名布

題雪巖圖壽麗卿乃翁

明  
廖道南

雪巖何峻極江上玉芙蓉秀結峨眉地高標建業峰旋  
輝燭四野擬瑞慰三農細詠南山句嶙峋幾萬重

題彭宣慰壽圖

明  
廖道南

寶牒開商祚金符錫漢朝江迴南國紀星轉北辰杓駿

烈超擒虎鴻勲集射鵬遙知彭祖壽歌頌滿雲霄

壽申封君歌題青鳥圖

明王世貞

君不見申公七尺蚪髯蒼雙目稜稜紫石光賦成不肯  
獻天子大笑拂衣歸故鄉生駒挽弓三石強妙舞劍器  
黃金裝解言報恩公子里亦曾結客少年場懷中藍田  
雙白壁但令心知輕一擲歸來叩牀忽絕倒綠酒新熟  
琥珀色何言中路多齟齬閉戶談玄學沖舉石室時窺  
龍虎文洪崖亦送煙霞醕鄴河之傍春卜居三花琪樹

鬱庭間忽聞青鳥瑤池使銜得長安天子書囊中豈無  
羽毛藥相期且盡人間樂玳筵急管醉莫辭遲爾三山  
駕鸞鶴

題孟里圖壽尤母

明  
王世貞

尤郎顏鐵蚪髯紅矯如嶧陽霜下松手攜客圖孟家里  
歸壽阿母觴春風孟母三遷去其故尤母却守先人宮  
啖子不必東家豬食親不必燕魚熊義方但就養志好  
圭筆也自春風中

題畫壽大參暘谷先生七十

明 王世貞

永嘉城外小緱山  
明月長容笙鶴閒  
總為暘湖泉石好  
未教王子厭人間

為林子騰茂才題桃源圖壽

明 王世貞

閩中喬木俱成林  
林家主人饒隱心  
時篴竹葉千斛酒  
來坐桃花萬樹陰  
淡日輕煙釀芳暝  
翠羽黃鸝喚妝醒  
開處疑蒸紫帽霞  
澆時欲涸旃檀井  
祝君度索三千春  
有子仍為金母珍  
漢帝方徵上林植  
可容長作武陵人

題靈椿圖壽卓徵甫光祿五十

明 王世貞

君不甘小草人能頌大椿年希知命域齒是噉名人跡  
與簋輿舊才從彩筆新猶聞上苑色絕勝武陵春

題栢舟畫卷贈高母

明 王世貞

誰言衛風蕩乃有共姜婦誰言吳趨薄亦有高令母當  
時髣髴歌栢舟今日青燈照白頭縱令淇澳清徹底爭  
似胥江不肯流

為范母題晚節寒香卷

明 王世貞

離離澗傍竹  
英英籬邊菊  
芬不逐衆卉  
榮不依凡木  
凡木豈無陰  
衆卉先競馥  
疇能傲霜霰  
誰歟安幽獨  
中色比黃金  
清心映碧玉  
所以范母賢  
挺然範閨淑  
天澤豈不廣  
晚施意仍篤  
嘉命播中州  
清風藹然郁  
太師倘有陳  
彤管將見錄

張步兵懷椿壽萱卷

明黃相

我向京師為客久  
寅月出門將及酉  
月明白露下庭柯  
風振秋聲在高柳  
松楸雙壁雲鎖深  
節物驚心幾回首



凌晨有客來叩門懷椿壽萱卷在手乃是紫髯張步兵  
索我題詩紀其後自云生孩七月父見遺苦辛撫摩獨  
有母寂寥煦沫三十春兒頗成立母亦壽伶俜孤影曩  
到今何怙籲天天知否淚痕不盡雨痕斑號聲迴出江  
聲右反思白髮倚門人瓶罌相藉宜相守白魚青笋足  
冬春祿養色愉忝升斗負郭石田二頃餘種秫年豐催  
釀酒半澆三尺墳上茅半祝南山酌一卮遺書數卷不  
忍觀和膽一丸長在口聞君此語重歎嗟幾家堂上雙

黃耆君獨得隴失蜀悲我似凡民更何有

題黃山烟樹圖為邵果齋內人壽

明焦

竑

黃山高高凌紫清七十二峰烟樹橫軒皇曾此鍊金液  
手攜玉女朝瑤京遙遙一去幾千載猶有真風至今在  
梁鴻埋照世不知翻因德曜留光彩綺筵行酒宵向分  
舉杯相邀鸞鶴羣翠微渺渺丹霞接髣髴靈璫響綠雲  
大道希夷亦等閒仙源只在故鄉間莫如弄玉高臺上  
一逐簫聲定不還

題李公子喬松圖稱壽尊君臨淮侯

明  
焦竑

天上何人手自栽青葱佳氣近蓬萊  
惟應帝子千秋後會見松花一度開  
雙闕風迴鸞縹緲孤峰雲盡鶴徘徊  
懸池擬獻長生露還仗郎君作賦才

題仙桃白鹿圖壽蔣參岳子徵  
明  
張鳳翼

朱明開壽域紫氣凝吳淞上有千歲實  
下有二茅龍杖屐寄東山聲華高岱宗  
雖開蔣詡徑已卜丁固松朝歌

麟趾章且也靈秀鍾熙朝崇世官次第期登庸

題扇壽愛蔬吳先生尊人

明 顧清

江海歸來一幅巾東風八十四回春日長勘罷參同契  
坐對青山即故人

賦蟠桃圖為張時震父母壽

明 顧清

玄洲髣髴海東涯海岸蟠桃大比瓜畫入綵縑疑著霧  
望迷仙苑欲生霞稀年令德真相配紫府丹臺別是家  
我欲金壺借餘墨一枝併寫杏園花

題畫松石為吳赤含壽

明  
李日華

昂昂石丈與髯翁丘壑煙霞氣骨同一自銖衣披拂後  
紫芝瑤草領春風

題竹溪圖壽竹溪老人

明  
李維楨

吾宗供奉謫仙人舊住徂徠溪水濱沿溪滿種蒼筤竹  
杯酒嘯歌偕隱淪竹色溪聲曾不改照映風流與文采  
龍鍾之竹產龍孫清溪一曲帶荆門古今兩見竹溪逸  
盛事吾宗少倫匹輸君七十能關健觸目琳琅紛繞膝

張君好事圖竹溪乞我詩為君品題供奉百詩酒一斗  
我詩一篇奉君酒酒如竹葉漾溪流溪成酒池可拍浮  
底事求仙仙亦謫一日醉鄉足千秋

題九如圖為高觀察四十壽

明董其昌

網紀雄東表文章有代興江山增潤色日月共騫騰  
甫神鍾嶽蓬萊海閔陵郎潛猶始壯公夢已堪憑  
列栢羣鳥下鳴岡瑞鳳升出雲俱四嶽為壽叶三朋  
弧矢揆初度彤庭寵恰承穆如嗣作頌不獨九如稱

題百萱圖壽李本寧母太夫人

明董其昌

突兀古雲根紛敷赤棘翻堂前霞綵絢天上露華溫託  
質從玄圃忘憂合道言應持比金母百億化身繁

樂壽圖為潘百朋壽

明董其昌

江南欲作名園記海上河陽看世濟尚書綦履故遺聲  
右轄風流恢賜第考德真將獨樂同貽謀却與平泉異  
種木於今及百年歌鐘甲第常依然閱盡人間陵與谷  
肯堂肯構歸象賢森梢嘉樹成蹊逕突兀危峰出市廛

白水朱樓相掩映中池方廣成天鏡  
刷羽鳬鷺迎向人  
灑嚼游魚波不定水北樓臺照碧霄  
桂為棟兮蘭為橈  
邀賓盈百猶虛敞鼓吹數部仍寥寥  
水南嵐翠何縹緲  
琯琢雲根成天矯磴道周遮洞壑深  
游人往往迷幽討  
飛梁百尺亘長虹別有林扉接水窮  
名花異藥不知數  
經年瑤圃留春風主人夙有煙霞賞  
王事馳驅多鞅掌  
又銜新詔五羊城萬里家山勞夢想  
不辭為作輞川圖  
一似披形入玉壺畫繡正看榮梓里  
年華況值挂桑弧



君不見鴻乙草堂傳畫史一丘一壑徒為爾又不見洪  
厓仙人拔宅居舊時城郭曾無餘何如世業儷金谷吏  
邪隱邪俱不俗五嶽仙山縱所如卧游鄉思常相續君  
生亦是我生辰大斗年年持介福

嘉平十四日題寫古梅壽襟海丈

明

李日華

偶試呵冰手來拈琢玉花煙籠三百緜雪綴六十葩春  
信笑中得高情物外賒主人方介壽持此報年華

韓參議家慶圖

叔祖暨父  
各九十

元  
袁  
桷

丹泉為醴菊為殖的的龐眉似畫圖萬石齒高勤澣洗  
二疏年並得歡娛兵前父老難尋伴眼底孫曾總業儒  
欲向碧桃花下醉斑衣紫綬兩相扶

張希孟嘉慶圖

其祖伯祖皆  
年過九十

元 袁 桷

舜泉清且甘厯山秀而朗淳風邈泠泠舊俗遺穰穰怡  
愉二老歡敦龐百歲長銀光浮勝頰素髮垂過項階庭  
尊孝謹閭里化廉讓春風連理枝晴日九節杖犢車共  
東西漁舫同下上蠶麻課餘閑豚韭隨薄養薇山悲首

陽菊潭陋胡廣媿彼非禮羅居然嬰世網孫枝朶天葩  
祖風躡遺響含飴記疇昔興門慰期獎冥鴻天機韜喬  
松白雲往緬焉清風佳庶作高山仰

秦元卿家慶圖

元馬祖常

天爵榮良貴皇家錫顯封恩光依上國寵渥蔭華宗椿  
悅荆交豔萱妍桂競穠園亭春掩映桑野畝縱橫令子  
官薇省諸孤胄辟雍儒功誰表率善俗此儀容

題晉寧申氏家慶圖

元程鉅夫

申家盛德映當時家慶圖中始見之盡出橐金援滯獄  
潛輸囊米濟鄰饑已驚賢婦能齊壽復見名郎有七兒  
最是舍傍羈旅者感恩猶自說流離

贈別柯伯庸歸省親柯自龍虎來臨安邀予三茅  
山中出示方壺所作東柯谷圖及翰苑諸名公  
詩一帙且曰吾垂白之母在堂將歸省焉請與

子別因賦此贈

東柯谷者蓋其家居地也

宋戴奎

天台萬八千丈高插天勢與鴈宕天姥諸峰連芒屨竹

杖昔尋訪層巒絕壁窮攀緣是時憑高一縱目異境復  
來東柯谷幾灣流水聯玦環數點晴峰刻瑤玉回頭十  
載昔未遊黃塵撲面雙鬢秋柯君一見與我談舊隱剪  
燭共醉吳山樓示我東柯之圖纔數尺元氣溶溶霧煙  
溼玉堂諸老亦神仙錯落文章列圭璧君言束髮居龍  
虎學仙期與松喬伍生平雖只戀還丹歲久寧無念鄉  
土嗟吁故林歸獨遲相逢異縣兼喜悲細觀詩畫久不  
厭躊躇如在登臨時錢塘五月熟梅雨此日憐君一帆

舉縮地應無跋涉勞升堂要覩慈顏喜紫霓裳丹霞酒  
拜奉親前為親壽喜懼雖因鶴髮前踟躕復似斑衣舊  
西風一日秋滿山羣君有約須君還路經茅君壇下幸  
相報我亦從之放迹蓬瀛間

題方壺子天台圖送曹士安省親還上清

元  
丁  
復

仙人飈車竟獨往我家天台不得還六十江上老為客  
半夜夢中無數山雲飛舍下兩白髮桃熟溪頭雙綠鬟

更煩爾祖方壺子寫我與君劉阮間

題劉山長雪夜板輿圖

元薩都拉

板輿行樂處鶴髮儘髣髴人子誰無母劉家獨有男諸  
孫嬉掌上阿母度溪南玉宇光連夜顏酤酒半酣

題胡伯衡飛雲圖

元楊載

未應時命固相違千里遨遊久不歸已占龍頭承紫詔  
更斬馬首賜朱衣塵沙客路牽愁遠泉石家鄉入夢稀  
日夜思親心更切滄浪悵望白雲飛

家山飛雲圖

元程鉅夫

吳雲楚客兩羈孤我亦先人有敝廬風雪江湖歸路遠  
不知誰為寫成圖

題潘叔寬望雲圖

元貢師泰

日入無返照雲出有歸期雲歸在山阿親死獨何之思  
親不可見亦有墓與祠朝望怡我目夕望慰我思風吹  
白楊樹露滴青松枝翩翩華堂鶴鳴聲一何悲不有望  
雲作孰繼南陵詩



望雲思親圖為王大使作

元  
丁鶴年

山人愛雲不離山巢居只在雲松間枕前漱玉弄明月  
此心直與雲俱閑達官愛雲雲作侶平步青雲稱高舉  
天飄一滴慰蒼生大旱用汝為霖雨王公出處與此二  
者殊十年游宦感離居衣上猶存慈母線手中長把嚴  
君書日日看雲不遑暇為有吾親舍其下恨身不得逐  
雲飛却寫飛雲入圖畫公餘展玩凝心神見雲如見吾  
雙親卷圖仍寄吾親舍永奉高堂長壽身狄公盛事王

公繼今古孝思同一致

題張伯源夢父還家圖

元張庸

東海浩無極潮生如有期為客千里外歸程杳難知阿  
爺昔向西州去望斷風塵不知處潮生潮落幾朝暮門  
前踏破青莎路小窓月落天宇寒夢爺忽從東海還明  
朝即上長溪道豈意相逢溪上山道傍躑躅驚復喜瘦  
影塵衣如夢裏艱難共說別離情不知有淚如泉水君  
不見世塗橫絕豺虎前千里感夢只自憐海波腥吐蛟

龍涎幾人渡此能生全歸來宴坐奉顏色眼中如覩天  
日白剗肌煮糜身不惜勸爺莫作他鄉客

題陳象之與母避寇圖

元張庸

海去松溪纔數里溪流直下隨海水玉虹飲水夜不收  
一朝海寇如蓬起陳君溪上居有母八十餘傳聲海寇  
至啼散樹頭鳥吹脣鼓譟海倒立憑誰與母天雨泣神  
使婁生與之俱寇竟追之不能及初懼力不勝何以逃  
母生籃輿軋軋翻覺輕瞬息前行知幾程寇方抄掠猶

未去興母更入山深處緣崖覓路恨不飛縱有遺金寧  
復顧黑風撼海寇上船夜來始覺無烽烟次第歸來訪  
鄰里幾家骨肉誰家全眼前生理誰暇數見母加餐忘  
却苦

瞻雲圖

明  
廖道南

梁公千里獨瞻雲春到鄉山草木芬我亦有懷登咭叱  
夜深孤立看星文

李氏奉親圖

元  
程鉅夫

高唐李家宜人史世世順孫并孝子今人創見古尋常  
養志承顏政如此春風秋月花滿川小車長耳相後先  
生縮二尺粉墨其中有至樂無由宣坐中親賓歌拍手  
宇宙之間一樽酒黃犬東門竟不歸青牛西去知存否  
何如我翁八十強紅顏雪鬢雙電光醉歸不怕驢自穩  
有兒左右扶車箱長聞貞觀開元際老大昇平飽嬉戲  
丹青不見見殘編好好護新圖示來世

題白華圖為本齋王公

元王壽衍

母慈子孝覺天全桃發華枝豈偶然名士品題圖畫卷  
他年當不負凌烟

題白華圖為本齋王公

元湯彌昌

白華載補三百篇蟠桃一實三千年方士招魂術通仙  
思母念母心通天孝感誠應玄又玄生祥下瑞理則然  
圓明示寂佛果圓王母今在瑤池前白華變幻丹葩妍  
蟠桃彷彿青枝連玉苞瑩若冰壺懸心目洞照無中邊  
太史載筆青瑤鐫斯文斯文百世傳

題白華圖為本齋王公

元陳方

蓼莪霜氣入袈裟  
銘筆當歸學士家  
更為白華添後傳  
東風誰忍看山茶

題白華圖為本齋王公

元龔璠

白華久不補誰識孝子心  
寸草報春暉後來存雅音  
散火冰雪中孤標凝太陰  
一氣類冬筍冷燄分蕭岑  
茫茫東海波斂之碧壺深  
花如慈顏開枝似兒手簪  
王氏琳琅秀佛香薝蔔林  
孝子獨何為感通無古今



御定歷代題畫詩類卷一百十八





總校官庶吉士臣張能照

校對官檢討臣郭寅

謄錄舉人臣何思鈞